



GAdaricus filius Balti post patris obitum com-
muni Gothorū consensu in regni solio collo-
cat. Is ob rerū gestarum magnitudine (ut Iordanes,
Rodericus Toletanus, et Albertus Crantzius testā-
tur) Magni cognomē adeptus est. Nam subditorū
irritatos inuicē animos ad concordia & pacē redu-
xit, ac in officio cōtinuit. postea etiā uicinas gētes,
quæ se nō solum in pristina libertatē uendicare, sed
Gothicū nomen abolere statuerant, superauit & re-
pressit. Maximum illi bellū cum Gepidis fuit, qui
Vandalos & Scythas sibi coniunxerant, & subito
præter expectationē Gothiam inuaserant. In eo e-
nim nō tantum de fortunis, sed etiam de salute & li-

bertate dimicatum. Tandem inter utranq; partem conuenit, ut Vandalī post
hac non subditi, sed socij & confœderati Gothorum essent. Deinde Gadari-
cus arma uiresq; suas ad Scythas usq; extendit, & ad præliū imparatos supera-
uit. Cū aut Gadaricus in Vimerugiā reuersus esset, Scythæ iugū impositū im-
patienter ferentes, à se reiecerunt, & armis suā libertatem recuperarunt. Cla-
ruit Gadericus circa annum mundi 2640. Ioan. Mag. lib. 1. cap. 20.